

Pà i Santi in paesi

Pà i Santi, Ghjulia, Carulu è Andria erani cuddati à passà si a ghjurnata in paesi. Carulu era cuddatu a dumenica nanzi par puliscia u cimiteriu è brusgià u rumenzulu. Avia apartu i balconi di a casa ch'eddu ùn si sintissi micca troppu u rinchjusu. Ma Ghjulia è Andria, da u ghjornu ch'eddi erani falati à stà in cità, ùn erani mai più vultati in paesi. Ghjulia avia purtatu a cuddazioni pronta. Andria s'era missu in scarpi grossi da pudè marchjà un pocu in campagna.

À tempu ghjuntu, era corsu à veda à Petru Paulu chì l'aspittava. A mamma di Petru Paulu, a sera nanzi, avia fattu cocia à posta una pignatta di castagni frassittani, cù u finochju. È po dopu, à usu di nanzi, avia sguttatu i castagni è n'avia fattu una cullana da Andria. U ziteddu a s'era missa à coddu, è po andatu à fà la veda à Ghjulia è à Carulu, era vultatu à discorra cù Petru Paulu chì sciappava i legni in piazza.

- Conta ghjà ciò ch'è tù faci in cità, o Andri.

- Oh, ùn facciu tanti affari, o Petru Pà.

- Comu? Vai à a scola, ghjochi cù i to cumpagni.

- Quissa sì.

- È allora, in scola, ti piaci ciò ch'è tù studieghji?

- Iè mi piaci assai. Hè assai sfarenti da ciò ch'e faciù innanzi.

- Quissa a mi pensu ancu eiu. Nanzi eri in prima scola è maestru ùn avii ch'è unu solu. Avà, invece, in cullegghju, i professori sò parechji. Ma tuttu hè affari d'abitudine. Ti sè fattu qualchì amicu?

- Isiè, ci sò trè ziteddi chì stani à vicinu à no è ci semu amicati. Andemu insemi in cullegghju è ci ritruvemu par ghjucà.

- Megliu megliu! Casca mali à stà solu in u so cantu. Quissa a vita hè bona da i ghjacari è micca da i parsoni.

- Cun eddi ùn mi sentu micca solu, è po ci ghjuvemu assai.

-È po stendu à vicinu à to minnana è to missiavu i po veda più à spessu.

- À missiavu u vecu guasi ogni ghjornu andendu à a scola, chì eddu da matinata, si tira sempri dui passetti in i cuntorni. A minnana a vecu quand'e vò in casa à eddi, chì edda ùn esci tantu. Ùn a si senti micca. D'altrondi issi pochi tempi hè pighjurata a so saluta.

Rinatu Coti "A spasimata"